

南夷笮都地漢爲沉黎郡龍安卽古冉駹地松潘亦古氏羗地漢設護羗校尉居此雪嶺在其境內建昌卽古越雋郡又謂之獠郡其夷又謂之羅羅

西番與蜀相近貢道必由錦城有三歲一至者有一歲一至者其貢則小鍍金銅佛銅小寶塔彩色小畫佛銅鐵刀劒盔甲及珊瑚唵叭香舍利子氍毹諸貨也舍利子止小菉豆大紅紫色用香綿包裹問其俗云伊國人初生時卽能言前生功果者國王拜爲國師僧人老死能前知死期而以所餘付後人者國人卽謂眞佛遂合衆同焚從灰燼中得舍利今來獻貢

之僧皆係中年紅補衣僧帽束五彩軟帶乃伊國之尊官法師中朝之賜衣也言語不通中華食牛羊肉而飲酒番物名不一志載惟足力麻鐵力麻氍毹三種而自蜀人言者有曰細氍工布氍毹絨邊工氍姜納大貨貼裡綿惟憑粗細顏色定價值

川扇不知起自何時然李德裕有畫桐華鳳扇賦云未若繪茲禽于素扇動涼風于羅薦則唐時此地已嘗製之矣竹本蜀所富有第不甚堅厚紙則出嘉州彭縣輕細柔薄惟可製扇是其來已非一日欲不克貢得手